

史
林
測
義

史林測義卷三十四

臣鄱陽計大受論

秦檜

君子於小人豈嘗絕望哉小人至秦檜亦已極矣然未嘗不自知其惡而畏爲公議所不容則人心之尚未死也使以畏公議之心而用之爲深悔用之爲痛改晚蓋之力亦可轉遺臭爲流芳若之何大謬不然而怙終迷復徒事掩覆之術以子燈領國史修建炎以來日歷又以孫墳修撰實錄又復禁野史俾不得紀朝廷事極文飾彌縫之巧以求逃於公議卒之公議不得而逃而野史國史臭厥載於

萬年可哀也已雖然君子於小人豈嘗絕望哉後世之或
至於檜或未至於檜者尙其取鑑於檜以無謬於用畏公
議之心也夫

祁宰 金

海陵之將大舉南侵也太醫使祁宰以人事不修天時不
順地利不便極諫而死其後皆如所言雖其盡言昏亂之
朝未達無自立辟之義而舉朝大臣自誣益溫敷思忠而
外無敢正救獨以一醫流犯顏陷諫義膽忠肝亦足千古。
泰和初詔定功臣謚尚書省掾李秉鈞以宰職非三品謚
例不及請特賜謚旌忠爲助名教誠哉名教之助也綱目

之修亦所以獎立名死節之士而殺諫臣者必有弑君亡國之禍尤謹書之以爲後戒續綱目失此不書豈以諫伐宋且弑其母他無遑問與雖然求之一時卓乎莫及風諸百世聞者以興何并沒之分注也

金廢主亮

春秋君臣之分尤嚴於昏亂之朝君無道爲下所殺必書曰弑其君左氏傳例稱人以弑君無道也稱國以弑君惡甚也誅亂賊而罪無道主並行不悖之義也海陵世宗降封亮爲海陵南人南侵至瓜洲約諸將三日渡江敢後者死衆危懼都統制完顏元宜因謀作亂薄海陵營刃之金史以元宜等

軍反帝遇弑書列元宜逆臣傳宋史及續通鑑亦書以金人弑其主亮續納目乃變文書曰金主亮爲其下所殺而不書弑所以罪海陵弑君弑母淫亂殘虐無復人理而廢其君臣之分也嗚呼廢君臣之分以治亂君君無道臣得而殺之父無道子得而殺之兄無道弟得而殺之夫無道妻得而殺之則大亂之道也何與治亂其爲不君其君安能復臣其臣之論者邪說也此必正以春秋之法改從金史宋史續通鑑之舊海陵罪大惡極則據稱國以弑例書曰金弑其主亮云邵氏宏簡錄書金主亮卒於宋紀又何祖略若是

白彥敬 金

御史大夫之官主明法繩治肅清朝政所賴直已而行不
避權幸卽不免爲當路所嫉羣小所銜以事中傷而非所
顧惟以糾正死職上報天子而已此豈爲身謀不克執義
者所可任乎白彥敬於正隆末爲北面行營都統世宗卽
位使石抹移迭等九人往招彥敬皆殺之雖海陵無道而
不受世宗之詔可謂知人臣之義矣奈何世宗購以官賞
恐爲人圖已而遂降乎其憚於禍而爲義不卒如此明目
張膽不遑恤身無其本矣世宗名爲御史大夫求如嘗任
張景仁而勉以古御史之行斯爲稱者竊意彥敬必不能

也未幾遣往西北招討司市馬適爲藏拙之地而金史傳
贊謂使久在此位其深謀讜論必有竦動人者誣矣

李顯忠

邵經邦宏簡錄論孝宗甫及正辰遽爾倅功張浚區區欲
藉歸正賊徒逃亡孽息冀以成功難已注指李顯忠本歸
正人所領劉光世兵初皆羣盜按顯忠父永奇以宋臣陷
金誓不爲用密戒顯忠若得乘機卽歸本朝無以我故貳
其志事顯忠嘗欲執烏珠歸國不就及計執撒里喝又以
臨河不得渡追騎奄至縱之而永奇與家屬二百口皆遇
害顯忠奔夏國借兵以報卒獲害其父母弟姪者斬之間

關歸朝成其父志由是觀之雖出逃亡豈非烈丈夫而忠孝之士哉賢於伍員遠矣夫顯忠旣厲忠孝之節而其勇敢又敵所畏避且素諳西邊山川險易經略中原實堪倚任無如以策恢復忤秦檜不獲立功於高宗之世也隆興元年浚使顯忠與邵宏淵分道伐金顯忠復靈壁遂會宏淵復虹縣金將士多降浚渡江顯忠又大敗金人復宿州諸將若與同心戮力則敵騎可盡中原可平乃致符離之潰者以宏淵小人恥功不已出乘顯忠不聽發倉庫而止以見錢犒士以烈日被甲苦戰搖人心而瓦解也邵氏不責以藺廉寇賈之義而詆以歸正賊徒逃亡孽息之難藉

以成功不亦刻而非情乎又按光世麾下固多降盜而無紀律然於紹興七年罷軍政以兵歸都督府命呂祉節制其軍酈瓊殺祉驅諸軍降劉豫矣卽十年金人圍順昌命光世援劉錡光世請顯忠爲前軍都統已非復向多降盜之兵況越二十餘年而猶然其故卒哉賊徒之說又何謬甚至謂孝宗承紹興轉徙之餘宜如勾踐十年生聚十年教育然後振揚威武聲罪致討當時諸臣無一解此史浩之流夫何足語而辛次膺周必大王十朋洪邁之徒議亦不及臣謂內修外攘諸臣當以周宣望孝宗而此卽左也相議姑爲屈身忍辱之說固宜次膺等不之及耳如史

浩湯思退雖未明援句踐爲言其云儻聽淺謀興不教之師其云保境息民爲自治之計何嘗不竊生聚教訓之意以飾偷懦苟安之情以奪梗和攻戰之策乎則豈當時無解此者金自采石之敗主弑國亂其勢寢弱徒張虛聲而宋人稍振非沮異議可復中原而雪讎恥故雖有符離之潰而後復視師金乃亟撤兵歸魏杞使金具言天子神聖才傑奮起人人有敵愾意金君臣乃環聽拱悚卒正敵國之禮不然和議必不可成卽成亦不可固而欲徐徐焉爲越沼吳之謀何可得也則夫引句踐而譏孝宗以遽爾倖功亦其徒讀書傳不知合變之見

金主雍世宗

西夏高麗皆臣屬於金而金得奉命討之義以正其國者也夏相任得敬為其主李仁孝分國與之仁孝且上表於金為得敬求封世宗不許謂此必權臣逼奪若彼不能自正則當以兵誅之得敬始懼雖見誅於仁孝而世宗慎封建之命嚴僭亂之討正一國以及天下之規模立矣夫何義行於西夏而不復力於高麗也高麗主王覲弟暭囚覲海島而自立暭以讓國告世宗詔有司詳問乃以覲表來言父遺訓傳位於弟又言其子有罪不可立之意丞相紇石烈良弼辨不可信有四是暭篡兄誣情於天子夫安可

忍遣侍郎靖往問覲竟不得見以詔授贍轉取覲表與前
略同靖還其不得見覲必無敢匿奏則誣情愈得然卒賜
之刑命一事在大定十年十一年而正以命討之義頤隙
若此曷以故張氏綱目廣義以謂觀世宗於得敬之事剛
正之氣宛然如在抑知只是客氣不久則消蓋發強剛毅
是以有執無其德也雖其爲治於國晚節不衰自謂敬慎
之心無時或怠或亦不誣惜乎法古聖哲之學不足以成
之故惟斤斤自守無大有爲之志以帥其運量萬事萬物
之氣而僅能爲金諸帝中之賢主耳

羅願

秦檜之殺岳飛也羅汝楫始論罷其樞筦既言飛獄具斂論死有餘辜附會之罪幾與張俊方俟高等夫以盡忠報國之臣死奸讒之口償國家之事豈非千古遺恨然而死忠死孝得其所哉抑所謂天命者非耶檜黨焉能爲臣知明大義如飛其於諸奸自無介介九原也宋史汝楫傳末記其子願知鄂州有治績以父故不敢入岳飛廟一日自念吾政善始往祠之前拜遽卒於像前人疑飛之憾不釋云雖欲示冥報之警而以疑飛則妄矣願蓋賢者時則瞻公之像憤公之冤而痛父之惡以喪其精魄此理之所有亦或除疑之會其適也飛無與焉

虞允文

臣讀虞允文傳至督戰采石竊嘆允文以危及社稷激於忠義達權應變運籌決勝爲千古儒生吐氣生色再三循誦不能已已或謂乾道間大用略無過舉則豈其然且夫宰相之道必有以正君之心而凡祛其蒙惑杜其驕泰者不敢不盡也允文難言之張說以佞倖有寵於孝宗擢樞府時允文爲左相張栻上疏切諫且詣朝堂質責允文允文慙憤不堪說亦未拜而罷然實陰附說竟爲說出栻而申前命此見之張栻傳者也又其爲相時盡取版曹歲入窠名之必可指擬者號爲歲終羨餘而輸之內帑以爲備

將來用兵進取不時之需然自是認為私貯典以私人而
以奉燕私之費版曹則闕乏日甚督促日峻中外承風競
爲苛急以重困民力此見之朱熹傳其封事中者也嗚呼
人君之心莫患於蔽以佞倖侈以羨餘允文不峻佞倖之
防而抑之不究羨餘之弊而革之而所爲若是幸而孝宗
終能廉知張說之罔亦無遂致殉於貨利之愆不然其爲
君心之累不亦大乎況乎忍恥遂非黨嬖臣排直臣又因
括取版曹貽苛督困民之害何啻過舉可言而謂略無過
舉者泥於其傳而失耳斯其爲國大得失所存論者不可
不詳也

孝宗

孝宗本紀贊以謂卽位之初銳志恢復夫志之銳者必有定識定力不容惑奪以失事機乃首納張浚之勸旋受史浩之沮而吳璘新復陝西州郡爲進取之先路中興之大機者且棄不保則無志恢復自其卽位已然固無怪於符離師潰遂議講和金帥貽書以要而盧仲賢之報使出湯思退之邪議入也史臣謂之銳志者亦以帝有英武氣象而曾聽浚出師不由三省耳雖然豈嘗猝聞下詔幸建康以繫中原之民望哉卽曰倚魏公如長城而其心之視爲迂闊已久矣又光宗立爲太子帝謂輔臣當博選忠良使

左右前後罔非正人尋以王十朋陳良翰爲太子詹事劉
摯兼太子侍讀張氏綱目廣義論曰孝宗教子得道若此
厥後光宗事父逆道若彼則天也非人之所能爲也

臣按

孝宗教子之道亦正有未盡者焉朱熹嘗進封事以謂自
王十朋陳良翰之後宮僚雖號得人而能稱其職者蓋鮮
又時使邪佞庸妄之輩或得參錯於其間所謂講讀亦姑
以應文備數未聞其有箴規之效至於從容朝夕陪侍燕
游者又不過使臣宦者數輩而已如此則當日之博選忠
良使至古前後罔非正人固非能慎終如始者矣光宗之
不德可憐談之天哉張益末之悉耳然則所謂早諭教與

選左右道貴有恆久而化成欲正天下之所繫命者所宜深講也

汪應辰

史稱汪應辰在朝多革弊事中貴人皆側目德壽宮方甃石池以水銀浮金鳧魚於上孝宗過之上皇指示曰水銀甚乏此買之汪尙書家上怒曰應辰力言朕置房廊與民爭利乃自販水銀耶續綱目分注雖云水銀實非買應辰家而當日未聞辨白則尙屬疑案臣玩中貴人皆側目語其出中貴之誣以聞於上皇及孝宗使應辰不安其位情事顯然且應辰勇於造道嘗釋克己之私如用兵克敵深

自省察而沽直牟利無復是理則分注爲可據也方孝宗之立爲皇太子也集議秀王封爵應辰定其稱曰太子本生之親議入內降曰皇太子所生父可封秀王此與英宗朝濮議歐陽修援引大記合尋以唐文若言乃詔改稱宗室又詔稱皇兄孝宗受禪遂稱皇伯夫何應辰乃不復聞執奏也濮議時禮官御史臺皆詆修首建邪議韓琦曾公亮趙槩附會不正其後程正公亦有當稱皇伯父之說以此遺誤應辰故亦無能力持其說與而理宗因亦皇叔其生父榮王矣至於有明興獻之議大爲聚訟數百年無與新立邪正以定一是可軒也夫又應辰曾爲秦檜大不悅

者求其祭趙鼎貶死文欲以爲阿附罪而不得及將誣張
浚以不軌應辰亦連逮其列傳云獄旣具檜死應辰幸而
免夫以君子不死小人之手豈幸也哉史臣於是乎失辭
矣

石琚金

臣事君以忠者分也君臣之相知不相知者遇也遇有不
同而分惟自盡不顧忠之獲竭不獲竭必竭而靡歟其分
所謂無適而非義無所逃於天地之間者此也石琚相世
宗世宗嘗召與內燕語諸王曰使我父子家人得安然無
事而有今日之樂者此人力也其傳贊云君臣相知如此

有不竭忠者乎大定末諫立元妃爲后悟世宗以安東宮
許敬宗一言幾亡唐祚而琚爲金謀者至竊案史臣之言
竭忠則大有語病一似忠之竭不竭視乎君之知不知與
必被以恩寵而乃感激致忠者何異斯其分義乖矣讀者
不可不辨或曰語有之信而後諫何與曰竭忠所以信也
文公之所謂至誠惻怛也試思周公深愛王室綱繆盡瘁
豈有待雷風之感而金縢之啟也與然而竭忠者幸則爲
周公不幸則龍比已矣

陳俊卿

嗚呼生人廉恥之性亦與國運終始之理也廉恥喪而國

之所存者幸也如憑怙權勢者既不恤怨惡於天下而奔走權勢者復罔顧笑罵於當年伺候意指助爲威福黨邪害正蠹國殃民亡無日矣故相陳俊卿起判建康府朝辭奏以去國十年都城風俗大變自曾覲王抃招權納賄向士大夫奔其門十纔一二尙畏人知今則公然趨附已七八不復顧忌臣讀史至此爲之掩卷三嘆寡廉鮮恥漸積

而然積重難返尙安可問寧宗度宗之世其附韓侂胄貢似道者大都頑頓集垢無所不爲乃知其來也遠旣極而至於此也如使孝宗以後卿言渙發宸斷貶逐覲抃察其趨附者悉加摈斥而登剛正不阿之士於朝則大爲懲勸

之餘何至人心之廉恥日喪遠於附韓附賈不知其事之醜不覺其顏之厚而韓賈卒因以賈亂亡之禍哉惜乎孝宗不足以語此乃貽病風喪心不可救藥之患於數世以終宋運也然則俊卿之識慮遠矣爲國家者欲銷亂萌必抑權勢杜奔競而所以厲廉恥之道可不急講哉

趙傑之

昔馬伏波嘗以聞人之過口不可得而言爲忠厚之訓雖然處朋友則規過爲義不尙包荒而戒訐訕亦忠厚不失至於朝廷議功議罪以爲刑賞黜陟而罰當其罪卽爲忠厚蓋用罰之始慎之又慎而不忍遽棄於小人用罰之際

則明正之以開其愧且悔之心而不忍終棄於小人亦不使天下之人疑而皆知聞罰以相戒斯卽爲忠厚之至也異哉宏簡錄之本前史書孝宗稱帝立心忠厚太湖知縣趙傑之不丁繼母憂令宰相降一官不必明言其罪降官而不言其罪不幾疑無罪而獲謹乎既失明罰大體且不孝之罰教之大者卽謂養傑之之廉恥反無以開傑之之愧悔不聞其引罪丁憂去職而以孝治天下之意亦微矣孝宗博士夫之美名而昧帝王之大道書之以表帝之立心忠厚亦烏足與言史識哉

王淮

朱文公熹提舉浙東力按知台州已除江西提刑唐仲友罪時王淮爲右相仲友其同里且姻家以故怨熹乃擢陳賈鄭丙俾與協力攻道學以沮之論者以熹故淮所薦不以戚里而廢公法而不知自賀得人反以爲怨嘆以不如趙宣子之於韓厥姚崇之於魏知古臣按淮之薦熹也以

揚萬里言人才爲宰相先務而疏朱熹袁樞以下六十人由是薦熹非真欽熹素抱而急與推轂使直已以行其道者觀其奪仲友新命以授熹以陰險傾取之事爲嘗試亦可見矣故一有忤即去之惟恐不遠且併其志同道合者去之誰恐不盡尙可與語趙宜興崇之風哉夫淮嘗稱有

公輔器者乃蔽以一己之私情不復顧天下之公議而道學厲禁爲之罪首道學之名由其創立遂以彪炳史冊頌慕無窮如淮者乃爲熹之叔孫武叔詬厲無窮焉豈不哀哉臣論及此慨夫人之居家立朝言論風采頗有可觀而出一念之差與君子爲難而小人爲歸往往類是甚矣學者不可以不謹獨也

徒單克寧

金

徒單克寧之爲相也世宗嘗語以宰相之職進賢爲上克寧謝曰臣愚幸得備位宰輔但不能明于知人以此爲恨耳臣觀克寧非不知人者嘗器張萬公謂後必代之爲相

然亦未聞遂列薦剡而每愧已不勝重任懇乞致仕若世宗謂宰相不汲引人才爲惡其才勝己與恐奪己祿位者又似非其情則或不敢以招權市寵開奔競輻輳之門乎然而登進君子斥遠小人爲國之公而無植黨之私何患乎此克寧蓋亦不能將順其君急於舉賢之美如世宗本紀贊之所致惜者也聞之堯以不得舜爲己憂舜以不得禹臯陶爲己憂況不逮堯舜遠其猶敢弗皇皇然勤求廣攬以爲天下得人而猥曰自恨不明乎雖則慎重勞謙得大臣體而古稱冢臣之忠曷其奈何弗幾

史林測義卷三十五

臣鄱陽計大受論

光宗慈懿皇后李

光宗之不朝重華宮也始以有疾壽皇傳旨而免既乃託疾不往羣臣屢諫至於引裾叩頭號泣而三年之間僅一再過宮雖帝天性之薄亦因皇后李氏聽宦者離間心銜壽皇而力制之也帝嘗趣命駕百官班俟出至御屏而終爲后挽留不得往焉及壽皇遘疾數月以至大漸請帝省視者眾方有動於羅點黃裳彭龜年之言曰朕心未嘗不思壽皇而后挾之同遊玉津園不予以問疾壽皇崩又不

予詣重華宮成禮以視唐武后之於高宗殆有甚焉至后之如悍驕縱如帝悅宮人乎自則研之帝寵黃貴妃則殺之擅封其李氏三代爲王家廟逾制衛兵多於太廟歸謁家廟推恩親屬使臣凡二百餘人下至門客亦令補官由此觀之但無武后運動山河呼吸霜露駕馭英賢之雄才權術耳不然以乘光宗之闇懦不夫易唐爲周之禍有不復見哉竊嘵值此三綱解紐之日而宋室之不亂者幸也周禮續綱目紹熙三年書后歸謁家廟發明襲胡文定春秋莊二年夫人姜氏會齊侯於禚傳長洲陳氏以其全抄可笑顧周之全抄胡傳亦多矣而此之可笑者尤在於全

抄而不通也。胡傳論莊公不能防閑其母，疑母不可制，故設爲問以明當制其車馬僕從。婦人既嫁制於夫，光宗者以夫而制其妻，何疑乎爾？而亦設爲問曰：夫可以制妻乎？不通如此。奚堪一噱！且豈以禮制其行耳？而尙待委婉於車馬僕從之俟命哉？勸說害義又何啻張冠李戴之病。

馬琪、金

章宗明昌初，戶部闕官上命宰臣選可任者。曰：安得如唐之劉晏，官用足而民不困？或舉琪。帝然之，遂擢爲戶部尚書。四年拜參知政事，詔諭之曰：戶部還難得人，以代卿者故用卿。晚耳，豈誠以琪果無愧于爲晏乎？夫晏惟能潔己，

奉公以率屬吏故侵漁路絕無事剝下益上而國計自充
琪則性吝好利至於私鬻省醞帝且謂以非僅胥持國貨
酒樂平樓比則始之稱爲不肯欺官不肯害民而用之者
夫豈其然史雖不著其掊克而好利者則必專利琪自不
能爲晏帝初不察其潔己與否而遽任之若晏抑亦不知
晏之所以爲晏矣則求如晏之足國而不困民又何待彌
文蝟興邊費亦廣之日急於議錢穀而迄於誅求無藝民
力浸竭然後知不免刺謬也乎若夫千古之任計臣而誠
欲使上下公私均蒙其休亦於晏之潔己琪之好利辨之
不可以不早辨也

陳亮

史稱陳亮才氣超邁志存經濟隆興初上中興五諭不報退居婺州益力學著書淳熙中詣闈上書極言時事因言錢塘非駐蹕之所孝宗赫然震動倅臣曾覬聞而欲見焉亮恥之踰垣而逃而帝欲官亮亮笑曰吾欲爲社稷開數百年之基寧用以博一官乎卽渡江而歸厲志讀書似此卓然有守不屑輕就而論者譏以喜於躁進何哉觀其紹熙四年對策有謂陛下之於壽皇莅政二十有八年之間寧有一政一事之不在聖懷亦旣得其機要而見諸施行豈徒一月四朝爲京邑之美觀時光宗以受制李后不朝

重華宮羣臣更進迭諫冀以感發其天良惟恐不及而亮
獨以爲不在問安儀節之末然則世子之一日三至寢門
曲禮之溫清定省無闕豈皆文貌弗幻亦何論之舛而與
於不仁之甚也謂非曲逢帝意以希拔擢不可蓋經屢遭
大獄躁進之情遂難掩於末路帝果大喜以爲善處父子
之間因以安於人子之所不忍安不敢安則亮實售欺君
父開罪名效雖其博學鴻才何足稱乎

畱正 趙汝愚

聞之暗歎大而心歎小膽大則有謀必成心小則有慮必
周二者交相爲用以勝大任者也觀於畱正趙汝愚乃患

各有偏至焉壽皇崩光宗疾不執喪正率宰執請建嘉王
爲太子監國代主喪事不報越六日再請御批云甚好此
雖光宗勉從尋有歷事歲久念欲退閑之詔請對復不報
然正於此時宜奮不顧身卽奉前批付學士院降旨以行
夫何得詔而懼佯仆於庭密爲去計及汝愚遽議內禪慮
有後艱而遂肩輿以逃不免棄國之議乎此正不能大其
膽以成厥謀而小心之過利害以亂其衷也夫立儲監國
主喪於義爲至正於禮爲至順於安社稷定國家爲至計
汝愚誠憂危而必不循正之論繼正之請潛謀於韓侂胄
結內侍以白太皇遽禪位於未及建立之皇子乎按之唐

肅宗爲太子以元宗失國卽位靈武且元宗旣有傳位之命諭者猶以爲命未及行而裴冕諸人急於榮貴致肅宗負叛父之罪雖冊寶至日肅宗尙謂權總百官不敢乘危遽爲傳襲而後世曾莫或恕今雖內外洶洶如一聞監國人心自安何汝愚之遽議內禪卽藉有御筆欲自退閏取太皇指揮亦不顧本以甚其辭箇建儲之口而非實意則寧宗不受命於光宗而汝愚陷君於惡視唐君臣殆有甚焉且他日必難處亦誠如正慮但以光宗之疾未瘳太皇亦曲致彌縫不使聞太上之稱內禪之說故寧宗得安然以據其位假如光宗知其事而不勝忿怒之情寧宗亦不

免猜懼之意其進復辟之議乎其執位定之說乎左右邪
僂乘之以構禍於君臣父子之間必將有不可言者又何
啻以與定策不擇人樹侂胄蠹國之大奸而且自貽伊戚
此汝愚不能小其心以周於慮而瞻決之過逆順以乖
其節也故曰患各有偏至也論汝愚者莫不賢其以貴戚
之抑定大計立大勳而臣獨本先儒之論靈武力爲矯正
如此亦庶幾帝王傳襲之義不因以晦云

陸游

禮法所以檢身而立名節自古文人無行特反是耳陸游
爲蜀帥范成大參議官以文字交不拘禮法人譏其頹放

因自號放翁朱文公嘗言其能太高遠太近恐爲有力者所牽挽不得全其晚節惟不以頽放畏譏反自鳴其得意弛而不張隨衆鶻突此其爲迹太近而易動於牽挽也雖卜其晚節如是而平昔定難言以守正不阿卽無再出爲韓侂胄撰南園閱石泉記一事文公之言豈不駿與史臣以其才氣超逸長於詩乃有春秋責賢者備之論夫游惡得賢至今放翁之號猶津津文人之口而鄙循禮法者爲拘學此亦士習之深憂也

蘇嗣之母白

金

蘇嗣之宋蘇軾六世孫也其母白年二十餘卽寡居服除

外家迎歸兄嫂竊議改醮白氏微聞之牽車徑歸曰我爲蘇學士家婦又有子乃欲使我失身乎史錄其勵節之說如此嗚呼夫獨不懼此說開天下以可寬假之路而因恬然於失身者之眾乎夫者天也婦無二適猶無二天古志之矣自師氏之教不設貞靜之性日澗猶賴列女傳有所傳以明從一而終之義未亡人尙有聞以堅之死靡他之節如白之說其不爲名家婦而且無子與守者倘援以自恕而亂其志斯貽誤甚矣白氏誠節烈年七十猶以被兵而嗣之官沐京拜辭兩學士像自溢於室臣之辨此亦爲不善學者說法耳

楊輔

夫所稱有用之才者必可以備國家之緩急而奮勉忠義
宏濟艱難史臣之於楊輔也以蔚乎有用之才論同劉甲
而輔殊多愧按之本傳輔知成都察吳曦有異志密告於
朝寧宗意輔能誅曦詔授四川制置使許以便宜從事時
人望輔倡義劉光祖李道傳游仲鴻皆勉之而青城山道
人安世通言尤切至雖云不習兵事內郡亦無兵可用誠
能奮不顧身奉詔以倡必有響應雲集之勢如安丙楊巨
源李好義尙以輔有人望託密詔自輔所來結諸忠義之
士以成平賊之功而輔顧遷延兩月但爲去計及曦移使

知遂寧遂以印授攝判兼成都而去續綱目以吳曦逐之書固罪曦之辭而捕爲所逐亦孔之醜卽曾以吳氏世帥武興爲曲突徙薪之謀而至此坐視僭據一籌莫展恆懼失守奉頭鼠竄有用之才而如是乎況亦別無表見也不知論贊與傳何至相戾若此

何異

何異知夔州兼本路安撫使七月西北有星白芒墜地其聲如雷異曰時火土交會而妖星自東南衝西北化爲天狗獨其將有兵乎後四年吳曦果叛宋史稱異篤寶君子意其憂國憂民必有積之惄忱效於居官不辭難不避事

以成匪懈之節者今知星變爲兵釁宜卽以聞於朝俾求
可以消弭全蜀禍亂之道無所不用而在夔路則預爲備
禦盜賊之方保全生靈之策以日以年弗遑身謀夫何本
傳但書以勺祠而去乎或以嘗言太廟芝草色白廩生兵
妖忤時相韓侂胄知言亦不見聽乃不復言而但爲去計
然如國家之害斯民之禍當官之責何與亦異乎所望於
篤實君子矣

蒙古主特穆津

太祖

自古開創之君其神武而不殺者夫抑亦毒天下而民從
之也非必不殺也不嗜殺者也彼其力征天下殘民以逞

而欲以一四海以克永世非臣攸聞却特特穆津爲元太祖史稱帝深沈有大略用兵如神故能滅國四十遂平西夏此豈能不殺者耶如其克者撫之俘者歸之則不嗜殺之仁存焉乃當圍金燕城許和引歸而取所虜山東兩河少壯男女數十萬皆殺之且屠密州絳州西域之蔑里城皆詳見史冊者或出其時帥所爲而鮮不謂由於帝之嗜殺矣雖然帝果嗜殺者哉嘗聞塔本戒軍士以毋妄殺則喜之聞岳璘帖穆爾訓諸王以仁厚不殺爲先則深嘉之若去兵至東印度國耶律楚材因肉端見諫以上天惡殺之象則卽日班師其攻擊靈夏以五星聚於西南則誓不

殺掠垂告中外又帝之克謹天戒以全活萬民如此此其
天命人心之所繫屬握符膺圖立混一之基垂百有餘年
之統豈倖也哉論者不可以不詳考而疑必不嗜殺之理
爲無驗也元史稽帝大貴之兆於其所自出則十世祖李
端父兒以母阿蘭果火生二子而寢夢白光化爲金色神
人趨臥榻而娠而續通鑑綱目云屢有光明照腹又生三
子而李端父兒共季此蓋有誤夫自古帝王之先靈異發
祥固將生是使獨也豈有三子同出之理且考宗室世系
李端父兒二兄曰博寒葛曰博合覩撒里吉不聞有四則
史云產一子卽李端父兒者較是

李好義

史臣曰李好義失於周防竟爲王喜所圖

臣謂喜之能圖

好義安丙不得逭其罪矣是何也吳曦之畔好義兄弟誓

死報國聞楊巨源亦陰結忠義謀討賊因密約與共舉而

丙有威望巨源所謂非先生不足以主此事者及曦旣伏

誅好義乃迎丙宣詔以曦首徇三軍而推丙權宣撫使平

賊之功實好義與巨源之力而喜故曦大將丙不併誅於

不肯拜詔之日失治叛黨之義其後喜欲戕好義爲曦復

仇乃當並集丙家刃向好義丙以此時執之於坐數其罪

而戮之易易耳何但爲救解而不與斷其禍乎史言喜之

謀丙不能止豈不能哉觀巨源與好義同功丙怒巨源想
功於朝欲羅織抵罪則令喜鞠其黨是假喜以甘心巨源
而除已逼且巨源嘗遺劉光祖書述初合好義於丙而丙
酬答之語鋟梓競傳丙已弗樂積成此禍謂獨無媢嫉於
好義而亦欲因喜以除之之意吾不信也故曰喜之能圖
好義安丙不得逭其罪亦庶乎春秋誅心之法

徒單鑑金

紇石烈執中作亂逼其主永濟出居故衛邸欲僭位猶豫
不決乃詣訪於丞相鑑從人望也鑑勸以迎立宣宗執中
然之及稱至寧貞祐之間尊改爲功惟鑑是賴嗚呼鑑豈

功臣哉咎蓋罪臣也第知其拱挹一言而宣立而不知其
拱手以聽賊之所爲而君弑也旣爲丞相又屬人望初不
聞慷慨赴難倡衆討賊執中詣訪時猶冀開陳君臣之大
義斥爲天地所不容立當復辟無得怙惡或可以沮兇悖
乃遽與之定計策立幽綱其君蔑如不問於是執中益無
所憚遣其黨奉迎於彰德而行逆于衛邸矣謂非鎰之有
以成執中之弑哉且當新君旣立請討弗聞而與之並受
王封其爲附賊何辭律以春秋之法必蒙首惡之誅史臣
以立宣而盛稱之紕繆甚矣此義不明而世乃有與賊共
功之臣君子懼焉至若續綱目以賢卒鎰亦錄其小而失

褒誅之大又宣宗卽位拜執中太師尙書令都元帥封澤
王續綱目以自爲書罪其專耳上文旣書弑立其專更何
足罪則眞書拜封明私援立功而不討賊以罪宣宗爲尤

張柔蒙古

金行元帥張柔爲蒙古所獲初不屈因質其二親遂降焉
此見之續綱目分注而元史不書其事意者尋卽破金之
將略金之地攻金之城終於傾金之社稷逼金主以死其
叛逆之罪莫大矣尙以方之徐庶而原其爲親屈之心哉
故不書周氏發明於此引趙苞之事程正公之說以示輕
重之權衡其云有父子而後有君臣其輕重爲可見旣乖

事之如一之義又據禮曰父母在不許友以死則其輕重爲可知夫不許友以死如聶政之於嚴仲子而以例委質事人者不尤舛乎若正公所謂必不得已身往降之臣嘗有身往降之不可身往死之可也之論夫以忠孝之大節所存其義不可不精後世爲人臣不幸而處此尙其無爲不兩全之說誤

奧屯忠孝

金

臣讀金史奧屯忠孝傳乃掩卷而嘆忠孝者仁之德人之所以爲人而名之至美也今則忠孝以命名而字曰全道若器然有其實斯附其名有其名必責其實以德命矣苟

無其德義安取哉矧此所以爲人者而君子之尤凜凜夫
空名也傳稱其幼孤事母孝夫孝中於事君顧無論苟當
河防搜括民積慘刻害物以爲國家之蠹而紂石烈執中
因其主衛紹王而弑之反自謂嘗力薦復用爲有功又附
之請降故君爵位籍沒其子孫夫何不忠之甚一至於此
求忠臣必於孝子而其始之稱孝者倘亦張行信疏論其
平生矯飾要譽云耳況事君不忠之卽爲非孝乎子曰觚
不觚觚哉觚哉先儒乃推之人不仁則非人忠孝亦名存
實亡者其不齒於人類矣悲夫

濟王竑

竑初以宗室爲沂靖惠王嗣及太子詢薨廄立爲皇子寧宗崩史彌遠與楊后矯詔廢之而立理宗先是彌遠以皇子不堪負荷語鄧清之雖本猜忌之私非爲國之公然其說亦未爲不當也按竑憤楊后專國政彌遠用事久權勢熏灼嘗書其事於几上曰彌遠當決配八千里又嘗指宮壁輿地圖瓊岐曰吾他日得志置彌遠於此又嘗呼彌遠爲新恩以他日非新州則恩州也彌遠聞之大懼思以處竑而竑不知真德秀時兼宮教諫曰皇太子若能孝於慈母而敬大臣則天命歸之矣否則深可慮也竑不聽以竑之褊隘輕躁愚闇而復諫如此豈尙有君人之度哉且他

日得志語亦殊非子臣所敢出卽使一旦踐阼其得罪母后貽憂宗社必有不勝言者至若霅川之變魏了翁洪咨夔真德秀等皆明非竑本意然竑於潘壬起事始雖逃匿水竇黃袍加身號泣不從而竑之義宜乎效死不立何竟不以死拒誠以死拒而何有不獲已如宋史竑傳所云不得已一語貽誤千古至發軍資庫以賞軍受守臣謝周卿等入賀則

委爲不與亂而不得也卽與約以無傷太后官家亦謂其事可成而襲陳橋兵變太祖以太后主上不得驚犯令諸將故事耳及見王黨皆太湖漁人與巡尉兵卒不滿百知事不成乃率州兵以討不然壬約李全接應而全果以兵

至謂不藉以作亂而爭國夫豈可信況值理宗卽位宜制
罪百官拜賀竑不肯拜而有待殿帥夏震捽其首果何心
哉律以春秋之法竑豈不受誅者但彌遠當日擅作威福
挾私任詐非可廢竑非可殺竑之人耳若以論理宗亦漢
文帝殺淮南王長不免尺布斗粟之譏蓋長名之尙至而
竑亦率兵討可議以親云

李全

宋史理宗本紀紹定四年春正月書趙范趙葵等誅李全
於新塘續綱目則變文以大敗李全於楊州城下全走死
新塘書書走死多矣無論其他寶慶元年書李全作亂焚

楚州許國走死國以制置使不誓死禦賊棄職而遁故書走死以貶絕之周氏發明亦以全書走死爲貶之之詞夫全者叛賊以走死爲貶豈以力抗王師爲褒乎殊不通可笑是役也下詔暴全罪惡敕江淮制臣率兵進討二趙乃出死力搏戰全敗趨新塘陷淖中葵率制勇軍追及支解之奉詔以成討賊之功不得僅以走死爲文而失天誅之義綱目凡變文書者必有以正前史之非而此轉宜正以前史但誅者快辭伏誅者重詞則予以重詞而書全走新塘伏誅三年十二月書李全寇揚州趙范趙葵會師擊敗之亦必易以討敗之云

內族板訛可金

將帥者國之司命始必慎於推轂一任以專閭之寄雖君命有弗受如必事從中覆往往貽誤軍機況立之監以掣之肘乎李唐肅代德憲之朝寵信閻暨任爲制將卽命帥出征亦以中使藍軍兵雖盛而權不一鮮或不敗以故用高崇文不置監乃可以五千入劍門用李愬不置監乃可以三千襲蔡州也且戰守有忤所議禮餽弗厭其意則猜隙漸生或矯殺而誣以罪或間搆而奪之兵至恣橫激變狀監軍以叛者有之監軍之設其害實甚金史以河中總帥板訛可苦戰力盡雖城陷猶可自贖乃以前在邠涇監

戰奉御六兒與之有隙有先入之讒竟死于刑因于其傳
末附以奉御在軍號曰監戰每臨機制變多爲所牽制遇
敵輒先奔故師多喪敗而哀金蹈唐之覆轍亦終亡國則
所以示後世長子之任不專而以小人爲監致與尸之戒
至深切矣夫何有明成祖不復懲前代之失用內豎監軍
如唐制迄於莊烈時監軍監視總監薨然朋興而諸內監
多侵尅軍資臨敵則擁精兵先遁諸將因皆無功古今之
害若一又況賊至而不開營獻城降者之寥寥也明亦坐
是亡可不鑒哉可不鑒哉

史林測義卷三十六

臣鄱陽計大受論

理宗

論宋與元會兵伐金者。渺不答理宗以不鑒宣和海上之盟。如當時趙范所云。且昧于唇亡齒寒。先號後虞之勢。致汴宋爲亡。遼之續而南宋亦迄爲亡。金之續也。曰否否不然。金者宋之君臣萬世所不共戴之讎也。非可與遼同論。遼爲兄弟之邦。有救災卹鄰之義。徽宗之世。金則虎狼。遼則扞蔽。與之併方以抗。亦所以固吾圉。乃通金而共圖之。誠爲非義而失策。若元之攻金。理無救卹。金之必亡。其勢

已見理宗乃能使孟珙以蒙古兵入蔡州函金主守緒之
燼骨以歸而獻俘太廟復仇雪恥可以告無憾於天地祖
宗假或取鑒宣和不與共功元尋滅金而宋室之仇終無
以報雖出爾反爾之足快要不若同謀成事之差強也若
襲虞虢之說者此狃於曩日滅遼利害之見而無當今日
滅金大義之論況不與之會伐而遂唇有不亡齒有不寒
者乎惟滅金之後不爲長慮却顧而貪地敗盟啟釁強鄰
殆將來以續亡金之禍夫豈前與共功之過哉下詔罪己
亦有合謀破蔡假道及虞之悔則反昧於所由致寇而亂
必雪仇恥之初衷矣帝廟曉曰理謐議固以表章濂洛關

闡上繼洙泗之學然製道統之贊崇先哲之祀求之議道
自己尙屬虛文臣竊惟綱常之道未湮君父之仇必報此
亦天理之在人心而不容以泯沒者聖人所以大復仇之
義昭垂千古而徽國諸君子嘗不啻大聲疾呼於忘親釋
怨之朝以維持斯理於不敝帝獨毅然有以酌五國城之
辜焉得乎天理之正卽乎人心之安理之爲理庶旣其實
而罔愧夫

趙蕃

臣齒幾耄矣杜門楓溪別墅顧影桑榆而身心之警省彌
迫蓋當受書家庭世父先臣廷式勉以持敬思誠切要之

學中更科舉作館不及如昔賢所謂立定志向無妨爲已
如是者三十餘年乃克謝遣一切專力先訓忽忽於今瞿
然衰耄惛耄之至而未敢以安耳觀史至趙蕃傳蕃年五
十猶問學於朱子旣耄猶患末路之難命所居曰難齋不
亦先得此心乎於是愈覺一息尙存而勝怠之難去妄之
難兢業曾何容釋也蕃恬于仕進惟學是務而敦氣誼始
師劉清之清之守衡州乃求監安人贍軍酒庫因以卒業
至衡而清之罷蕃卽丐祠從清之歸其後真德秀書之國
史曰蕃於師友之際蓋如此肯負國乎又劉宰之言曰文
獻之家典刑之彥歸然獨存猶有以繫學者之望者蕃一

人而已然則蕃爲宋醇儒非但詩賦翰墨聞于當世者史不以列儒林傳而附之文苑誤矣

金主守緒哀宗

宋孟珙以蒙古兵入蔡州金主守緒自經死史臣本紀贊曰在禮國君死社稷哀宗無愧焉按自宣宗徙都汴京社稷宗廟斯在哀宗自審不克擬太王創業垂統之仁而去之則必從古人効死勿去之義而守之乃當事勢危急效匹夫輕身之事出奔河北走歸德走蔡州狼狽蒼黃苟延殘喘及無可逃而後就死較諸晉懷愍宋徽欽覲顏忍辱服爲臣虜則可矣以言無愧於死社稷則未也明崇正末

聞逆犯京師。諸臣請駕南遷。莊烈帝諭以國君死社稷。將安往耶。及內城陷。登萬歲山壽皇亭自縊。嗚呼。斯乃謂之死社稷矣。自古亡國之君。至於莊烈。其義始盡。而哀宗烏足以語此。

完顏仲德

張天綱

金

史稱尚書右丞完顏仲德文武忠亮。始終無瑕。南渡以後。將相一人而已。諒哉。觀其於蔡州既破。聞哀宗自縊。乃罷巷戰。謂諸將士曰。吾不能死於亂兵之手。吾赴汝水從吾君矣。諸君其善爲計。遂赴水死。又終於殺身以成大節。如此而參政李木魯。婁寔。兀林答。胡土總帥元志。元帥王山。

兒紂石烈柏壽烏古論桓端及軍士五百餘人皆從死焉。豈金之累世。有德澤以浸灌其心。禮義以固結其志。而獲此效于國亡之際哉。惟感孚於仲德之忠亮。而且聞其名分之教有素。故皆曰相公能死。而我輩寧獨不能也。若參政張天綱爲宋將孟珙所得械至臨安對宋主真不畏死之詰曰大丈夫患死之不中節耳何畏焉。祈死不已雖宋不之殺而後莫知所終亦必得其死所者史贊以謂仲德天綱諸臣不變所守豈愧古之義士而所稱古真義士則能死無後智伯之豫讓焉。如言無所爲而爲之似矣。而其實讓固不足以爲斯人之髣髴讓臣范中行則反顏事仇。

行若狗彘臣智伯則報之深而爲之死効私恩昧公義史臣乃循當日趙氏語以真義當之以無愧求之此臣響者

讀史記至讓傳不得不著論以正之也仲德輩相率以殉君國之難則明於萬古君臣之義不敢不致死焉庶幾聞古義人若夷齊者之風而興起百世下者矣豫讓云乎哉

王鶚

蒙古

王鶚嘗曰學者當以窮理爲先分章析句乃經生舉子之業非爲己之學也嗚呼爲己莫如忠孝窮理莫如仁義鶚蓋言之則可聽而行之則弗顧者也鶚爲金正大初進士第一人累官尚書省左右司郎中金亡不死乃就世祖藩

郎之聘嘗因見請曰天兵克蔡金主自縊其奉御絳山焚
葬汝水之旁禮爲舊君有服願往葬祭世祖義而許之至
則爲河水所沒設具牲酒爲位而哭夫鶴之義宜以死殉
豈僅爾耶時以聘往或爲欲請葬祭而屈而尙未委質受
官使於祭哭之餘自投於河則死未爲晚而全乎金之臣
矣夫何稍有見於其義而終不能舍生以取則所謂窮理
以推致於義盡仁至者無其學矣況卒蒙羞惡於新朝喪
鑑稱鶴以儒道自任儒者之道三綱五常所任安在此又
論者之謬也

毛惜惜宋張鳳奴金

嗚呼甚哉畔亂之世以士大夫而賣國偷生覲顏事賊者之真無似也人類之賤至於倡女則已極矣宋金二史列女傳末皆附以倡女事宋之高郵倡毛惜惜于染全之據城以畔恥供給其宴飲曰妾雖賤妓不能事畔逆爲全所殺金之許州倡張鳳奴被俘至汴京城下時北兵攻城急天呼于矢石之際曰彼軍不日去矣諸君努力爲國堅守無爲所欺言竟投濠而死史臣以爲錄之者蓋有所激曷激乎亦激于士大夫之行反有弗似耳弗似而窮諸至賤其尚矣似不亦大可醜乎不亦大可哀乎然而人臣之義

下而愈沉

汪世顯蒙古

金亡郡縣皆降蒙古獨鞏昌總帥汪世顯堅守不下一日謂其眾曰吾平居享國高爵厚祿死其分也但千萬人之命懸于吾手與其自經於溝瀆姑徇一時之節孰若屈己紓斯人之禍乃迎謁闢端以降自經溝瀆之說聖人爲可以無死者言耳豈分所當死而與之藉口乎如欲救千萬人命則斷頭以付將士使持告闢端以丐保全閩城軍民之意豈必屬已而乃可紓禍乎世顯蓋不能終始一節而轉以富貴功名垂涎於蒙古乃不顧國亡與亡之義不恤

反顏事仇之恥而竊聖言以自文君子有深惡焉

耶律楚材

蒙古

元宋子貞之論耶律楚材也以謂時承大亂之後天綱人理幾乎泯絕向使無楚材人類不知其何如耳按之本傳其說豈不誠然此續綱目蒙古之臣書死而楚材獨書卒蒙古之臣卒未嘗具官而楚材獨具官以錄其賢也若書憂卒者亦表夫爲國忠憤之心時瑪津后稱制與都刺合蠻擅權而豈於此乎有示貶之意哉張氏廣義謂所以誌其不克令終則非其旨然以楚材爲遼東丹王突厥八世孫其祖父忘雖而降金楚材旣事金又背君而降蒙古失節之臣雖有周

公之才美何足觀嗚呼頂門一鍼通身是爽夫以一時之人類言不可無楚材以萬世之人心言不可有楚材君子有見於天網之重人理之精較宋氏之爲泯絕憂益深遠矣

謝方叔

宋自金人入據中原而尙可圖存者藉川蜀之形勢也蜀失則東南不可保國無以爲國矣故論者稱張魏公有社稷大功者五其一用吳玠以保全蜀而誅秦檜直欲亡宋之心以忌鄭剛中治蜀有方略而罷之也臣於謝方叔爲相而讒余玠亦有深憾焉玠帥蜀慕諸葛忠武集眾思廣

忠益徙合州於釣魚而蜀始可保開屯田於成都而蜀以富實任使因才事皆就緒輕徭薄征邊民悅服所謂自賓慶以來蜀閫未有能及之者卽嘗慷慨自許挈故地還天子未免率爾大言而當其時追繼吳氏兄弟爲國保障以綵西顧之憂舍玠則奚賴哉至欲革軍中舉代之弊亦尊朝廷杜禍亂之遠謀而戎州帥欲舉姚世安爲代世安以厚結方叔子姪求爲之援方叔因倡言玠失戎利心且夕有變又陰嗾世安求玠之短陳于帝前玠聞有召命不自安一夕暴卒而蜀於是乎殆哉岌岌矣則方叔之黨私害之望國家之長城恣蒙古之侵軼其罪不在檜下人謂宋

之亡亡於貢似道以江南江北之險拱手與敵而不知兩川陷沒雖在景炎祥興之年自方叔之讒玠川蜀遂不足以扞蔽東南而亡國之勢已成於此也史臣論其相業無過人者嗚呼是尙可與論相業哉

吳潛

吳潛爲相於理宗之欲立忠王禩爲太子密奏臣無彌遠之才忠王無陛下之福史臣曰潛忠亮剛直論事雖近于許度宗之立謀議及之潛以正對人臣懷顧望爲子孫地者能爲斯言哉臣顧謂潛以較史彌遠之立理宗事旣不倫而理宗無子謹其母弟之子屬意託神器立爲皇子已

八年於茲矣建儲之議舍謹其誰與歸潛嘗請養宗子以
係國本以鎮人心又復乞遴選近族而俟太子之生至是
忽爲異說所謂近族宗子果安屬耶謂無彌遠之才意不
轉近彌遠之私耶沈炎劾潛姦謀臣測雖承賈似道風旨
亦潛之對不以正使乘其隙也或曰潛蓋見謹不克負荷
而爲此座可惜之憂所對顧不正與臣按度宗爲皇子未
有失德及爲太子孝謹彌篤卽位之初重道崇儒父作子
述其所名用亦多正人使非以潛對而理宗積怒似道因
陳策建樹則度宗亦何由深德似道遂委萬幾以聽師臣
而致宋事之不可爲也謂預見謹之不克負荷而以正對

夫豈篤論正者順理無私訐則反是其竟以爲訐而可乎

李璮

李璮父全以宋臣畔降蒙古續綱目理宗景定三年春正月書李璮以京東來歸秋八月書蒙古陷濟南李璮死之分注璮知城且破乃手刃妻妾乘舟入大明湖自投水中水淺不得死爲蒙古所獲史天澤殺之解其體以徇蓋據元史而以全節予之也按續通鑑璮以被圍久城中食盡軍士潰亂乃復出降於蒙古哈必赤史天澤斬璮於軍門此或本舊史璮則反復不忠之臣無爲宋死守之節者雖綱目凡例事迹悉據正史然元史明臣所修通鑑則續於

元陳氏似較得其實且事關名節之大所記懸殊若此亦未敢遽加深予之詞然則如之何瑄以殺書而分注爲蒙古所獲下附以或云被圍久瑄復出降於蒙古存爲疑案亦春秋貴慎之義云

米立

米立爲江西制置使黃萬石帳前都統制元兵略江西立戰敗被執繫獄萬石舉軍降元行省遣萬石諭立曰吾官銜一牙牌書不盡今亦降矣立曰侍郎國家大臣立一小卒爾但食趙氏祿趙亡何以生爲萬石再三諭之不屈遂遇害臣讀史至此不禁抵凡而嘆自來反君賣國奉仇稱

臣大多官銜一牙牌書不盡而不但一牙牌書不盡之人
以視此小卒且有氣節而曾無愧恥獨萬石也與哉獨萬
石也與哉

江萬里

理宗時賈似道宣撫兩浙以江萬里爲叅謀官最久宋史
萬里列傳謂其始俯仰容默爲似道用蓋指參謀時也又
謂性峭直臨事不能無言似道常惡其輕發故每入不能
久在位則指似道入相後萬里拜端明殿學士同簽書樞
密院事隨以論罷及度宗召拜參知政事亦不久予祠
而去也許氏浩論言與默猶冰之與炭若俯仰容默而又

遇事敢言。則倏爲冰。倏爲炭。有是理與。既以峭直狀其實。又妄意在幕之久。謂之容默。豈知其辭之悖哉。適同客飲。容問如許氏說。則萬里之峭直。終始一節。而其初何能久處幕中。不見逐於似道。曰似道爲宣撫。尙非威福自作之日。而萬里又嘗帝所眷注尤厚者。故能容其直言以爲己重。及正鼎軸之位。顯行忌疾之私。好諛惡直。崇佞黜賢。而于萬里亦遂以言積怒。擅斥不恤。前後違合。判若天淵。其故在似道不在萬里。許氏力排史臣之非。使爲賢相爲大忠臣者。不以曾受權姦籠絡留遺議於後世。爲一引躋舉。

張世傑

帝昺之遷厓山也張世傑結大舶千餘碇海中起樓柵如城堞奉帝居其間元張宏範來攻軍大潰世傑乃斷維以舟奪港而去張氏廣義以謂此乃益見其忠之至也觀其舟艦海陵山颶風大作露香告天有庶幾別立趙氏以存祀之語而溺死焉於以見其欲存趙氏之心艱而後已嗚呼忠哉臣顧謂世傑之心雖可諒其事則未爲合義夫去之爲計而欲以不死存趙斷維時帝昺猶在何忍委之而不迫與圖存乎若以諸舟環結不及衛帝以脫於難而爲將更求君之地自古喪君有君君子猶非之容遽以是設

心乎世傑之義宜於以死衛帝勢有弗支則如陸秀夫負之同溺以殉可也卽不然秀夫而有其事乃求潰圍以行其志可也世傑蓋武人惟憑一腔之血性未知裁酌至當於義理則亦愚忠耳猥曰忠之至乎

文天祥 家鉉翁 謝枋得

聞之大夫國體也國存與存國亡與亡斯一體之義而千古之臣軌乎丞相文天祥爲元張宏範襲執於五坡嶺吞腦子不死宋亡宏範遣使送天祥至京師天祥在道不食八日不死乃復食然已自分一死矣而不死者豈不果於爲夷齊哉臣知其必有爲也臣知其不忍以宋之亡而遷

畢吾事也世祖欲官之遣王積翁諭旨天祥不屈乃有儻
緣寬假得以黃冠歸故鄉他日以方外備顧問之說積翁
欲合故宋官請釋爲道士而畱夢炎不可謂天祥出復號
召江南置吾等於何地則亦有以窺其志矣不然旣不臣
元而尙欲生存以備顧問此何義也趙田袁氏謂雖一時
之權辭然箕子亦授洪範於武王不知授洪範者爲千萬
世叙彝倫必非千萬世臣子所敢援以自託也其後臨刑
謂吏卒曰吾事畢矣信乎其志其事至此而畢否則天祥
之以死殉久矣家鉉翁以執政介吳堅奉表祈請于元聞
宋亡旦夕哭泣不食飲者數月而何不盡節於賓館雖義

不二君而終於教授河閒賜號處士歸故鄉則無天祚之志而徒欲蒙寬假於新朝者與國存亡之義不已替乎宋史以足爲臣軌稱之竊謂有未足也謝枋得爲監司爲帥臣其知信州也與降將呂師夔戰於安仁而敗信州不守可以死矣乃變姓名竄伏建寧山中至宋室已亡又可以死矣奈何尚欠一死若其答魏天祐之讓以不死引程嬰公孫杵臼一存孤一死節以明終於必死不在遲速存孤則實非枋得可託而與程文海書謂某所以不死者以九十二歲之母在堂耳然則不聞其復出從二王以圖興復如天祥前自元軍逃歸之事蓋嘗以天時人事推宋必亡

而安仁之役妻子弟姪俘戮殆盡老母無所依母寧竄伏以養而固守臣節此其志也如非以母故則當日不能殉國之罪可少恕哉惜宋史列傳失記逮其母旣歿又可以死矣然卽所與文海書而知其心死形存以俟克葬而終喪耳乃其服甫闋而殯猶淺土天祐執之北去在道卽不食二十餘日不死乃復食者何耶欲一至燕拜哭謝太后攢所及故君瀛國公所在然後絕粒而死也天祥之死後於宋亡四年枋得之死後於宋亡十年然皆無害于與國存亡若鉉翁者讓於二公多矣臣因史臣軌之說而思不二君者事人之常軌勢有弗獲死之可也若與國爲體之

臣喪其元首而心膂股肱猶存者乎則軌有獨至非可不責以必死惟曰不貳而已也故卽不速死與不終死者以明之如此此信國所謂義盡仁至也夫又附論枋得一事呂文煥降元其從子師夔尋亦不受參贊督府之命而叛文煥與叛將劉整導元南侵爭以傾宋爲功枋得故與師夔善乃以一族保師夔可信請以爲沿江鎮撫使之行成且願身見文煥與議雖以文煥北還不果而不知其父子之必欲傾宋則愚矣無計以紓國難而爲俯首叛臣之謀又可恥孰甚焉其後師夔略地聞謝提刑來而馳射之亦思保其可信者且何如也臣觀之此殊有不慊於心

史林測義卷三十七

臣鄆陽計大受論

元

世祖

朱文公綱目統系例以周秦漢晉隋唐爲正統以周秦之間秦漢之間漢晉之間晉隋之間隋唐之間五代之世爲無統然則綱目之修在正統卽所以法春秋之大一統也乃又有爲閏統變統之議以黜夫暴君如秦篡君如晉如隋得國不以正者然孰是說唐宋亦不免於篡而得以爲正統何哉要之天下混一政教號令禮樂制度萬方於是

稟正焉握正天下之權朔曰正朔斯統曰正統閏變之名
可不設而文公之例其不易者也方孝孺邱濬則主春秋
之中外天之嫡庶爲論而不予元以正統謂當以變統書
中外之說臣於遼太宗論辨之詳矣至言庶不可以干嫡
然如自古帝王太太宗既絕支庶入繼得不謂之承大統乎
有宋之末主擁虛器權奸蠹國人不聊生是用自絕以訖
其命世祖平江南捐苛征弛厲禁亟救災傷蘇息黎庶制
禮作樂民物阜康傳世六七君類遵守其成憲以故明太
祖嘗諭徐達等曰元之祖宗有德格天撫馭華夏又嘗語
省臣曰元主中國且將百年朕與卿等父母皆賴其生養

由是言之亦豈非天命以繼宋爲生靈主而大統旣集正統攸歸夫復何議且太祖制定金陵帝王廟位次始自伏羲終以世祖則明以繼歷代正統其後嘉靖間以陳棐言罷乃徇私見而謬公論續通鑑書元制江南人有十等而八娼九儒十丐以儒爲無益而賤之邱氏謂其說本謝枋得而元史不載蓋爲世祖諱寧獻王通鑑博論又記貶孔子爲中賢事說者以爲此其所以主中國而無百年之運而不知是皆無稽之言也其謂本謝氏者疑因遺畱夢炎書言江南無人才未有如今日之可恥欲求一人如瑕呂飴翊程嬰杵臼廝養卒亦不可得之語而附會之耳無論

世祖用賢輔政如姚樞許衡竇默王磐張德輝廉希憲之屬皆重以深通儒術卽于江南嘗遣程文海訪求人才密諭必致趙孟適葉李亦豈不以其名儒與且設國子監設江南各路儒學及經史科又皆崇儒育賢之政以儒爲無益而貶之夫豈可信況巏巏曾述世祖以儒足致治而篤好之乎至元間建廟以祀宣聖之詔屢下以孔洙遜宗子於居曲阜者則嘆其真聖人後貶爲中賢之誣又不待辨而明者或以成宗卽位首詔中外崇奉孔子爲疑按之祭祀志則亦率由世祖崇奉舊章而使天下廟學自是無不完葺耳夫何疑惟帝嘗從僧格及江南總攝嘉木楊喇勤

智。請發宋諸陵。暴其骸。毀宋郊廟爲佛寺。視於先朝陵廟。不替其祀者。天淵其不克傳。如漢唐宋明之祚長者。抑豈不以是也哉。

劉秉忠

或問以釋子爲國勳臣。元則劉秉忠。明則姚廣孝。而二子孰優。曰秉忠優矣。秉忠與廣孝。其精陰陽術數之學。以結主知者雖一。而秉忠上書世祖於藩邸。首及典章禮樂法度三綱五常之教。孔子爲百王師。立萬世法。修復其廟堂禮器。實太平之基。王道之本。而無一依傍佛氏語。其引君當道。不已卓哉。世祖卽位以後。其所區畫。又皆治天下之

大經養民之良法。朝儀官制一代成憲。悉所裁定。以廣孝於成祖。僅僅發窺覬之陰謀。決戰守之機事者。視之彼則造亂。以徼倖於有成。此則制治而綱維於可久。優劣誠何如也。又問廣孝嘗遊嵩山寺相者袁珙曰目三角形如病虎性必嗜殺劉秉忠之流也然則秉忠亦嗜殺者與是又不然秉忠雖當殺運而每贊以天地好生之德王者之神武不殺故世祖征伐不妄戮一人其全活大理雲南江南者不可勝計珙知廣孝將亞秉忠以佐命立功業而連嗜殺爲言者辭之率也且夫佛氏之法根塵不偶諸相皆離而不爲恩愛牽纏則棄而君臣父子不以色身執著何恤

於喂虎餉鳶其流之弊必忍于殺人有同刑名原於道德之意廣孝雖其性然乎抑亦弊使然耳而若秉忠所謂不與法縛不求法脫得其超證者與

許衡

許衡之事世祖也以堯舜其君堯舜其民自任奏對之下嘗引孟子非堯舜之道不敢以陳由是以反諸其心所謂堯舜知天道而順承稷契又知堯舜之心而輔贊者必罔弗踐其實而不爲虛名乃覺無憾耳世祖于衡言雖剴切曾無見忤顧始則聞以利臣之王文統不獲時備顧問繼乃論列阿哈瑪特之權姦亦畱中不報及爲國子祭酒又

以短毀漢法者使諸生稟食不給引去終于領太史院修授時歷一事告成而已則欲藉以行道之名徒虛以故疾乞致仕太子乃遣使諭之無以道不行爲憂可善藥自愛以需有時也其君不爲堯舜不亦恥乎而猶立乎人之本朝不亦恥乎嘗語其子以竟爲虛名所累不能辭官死後慎勿請謚立碑意蓋如此抑歎然典謨外之功業了無足述也後之論者以有同於范質臨終之戒謂自知仕元之非舛矣夫衡非宋臣無質失節之羞元主中國率土皆臣仕焉何病況其從來言動必揆諸義而後發豈於出處大節尚有未審以貽後悔自夫印板論事者遂若衡以數語

大謬生平而數百年後得一知心可以不恨乎

王著

生殺者天子之大權雖有大罪焉孰敢擅誅以亂政刑王
著因人心憤怨左相阿哈瑪特乃與妖人高和尚謀囑皇
太子從帝如上都僞爲太子還立馬呼至擊殺之于時宿
衛高駕張九思大呼曰此賊也一語鐵案續綱目書益州
千戶王著殺阿哈瑪特于闕下分注因著臨刑有我爲天
下除害而死後世必有爲我書其事之呼附以朝臣王惲
論斷之辭曰著激於義殺身成名別本作成仁尤非死而不悔律律
以春秋誅亂臣賊子之法不以義予之可乎之說也以矯

殺爲誅亂是政權可得而竊也以犯分爲成名是氣矜可得而隆也以邪謀僞令爲激義是妖姦可得而黨君儲可得而詐也害義傷教莫此爲甚而妄援春秋以律不有以正之聖言淆而王法斁以爲天下後世憂者深矣周氏發明頗能辨予以討賊之謬但謂考元正史皆以誅爲文今綱目變文而書殺亦誤世祖本紀書王著與高和尚合謀殺之誅王著于市餘黨皆伏誅太子珍戩傳則並以盜書綱目如本之以合於左氏春秋求名而亡之例乃較得云

趙孟頫

嘗讀書自灌園之松雪堂友人吳文學蜚鳴繪圖以贈榜

於室之東偏臣之有松雪銘也蓋引以爲省克己之助
然每玩其閑礀柯森竦仰拂素雪蒼然之色不與眾物俱
萎又未嘗不嘆古人忠貞節烈其所以歷利害死生如斯
夫貫四時而不改柯而易葉若迺飛集凝曜絕塵氛而不
滓抑亦有合而見美之象也因爲之詩有嗟哉趙承旨齋
頭署松雪之句則以孟頫生平有深愧焉孟頫者宋之宗
室官參軍國亡家居以程文海薦忘不共戴之仇苟且祿
仕變節而起尙欲竊松雪之義以自欺而欺世亦彌覺喪
心焉耳獨是忠孝之至虧一本理欲之消長吾學而爭名
節之先不受物欲之撓涅于身心亦松之勁亦雪之潔則

凜然不敢徇外爲人而實力於省察克治閒者當何如也

劉因

至元十九年徵拜劉因爲右贊善大夫未幾因以母疾請歸二十八年復召爲集賢學士固辭不起觀其上宰相書亦似病實不能應詔故所著易繫辭說乃其病中筆越歲餘而遂卒也卽不然或如陶宗儀輟耕錄所記自謂不如此則道不尊耳夫何邱氏丁氏必議以因知元不可事故不仕而不顧書中所引君臣之義無所逃於天地之間之說也昔楚處南服使人聘孔子孔子往拜禮焉非以子西之沮當亦受書社之封以元主中國而事之不可然則孔

子非與爲是議者蓋皆明人意主於擴元旣乖因之本心而因謂得罪於聖門中庸之教抑亦在此

伊實特穆爾

綱目率諸臣例賢則書官爵以示予不書官爵者貶辭也續綱目於太師知樞密院事伊實特穆爾卒不書官爵非允按伊實特穆爾史稱器量宏達莫測其際世祖躬討叛王納顏至半道伊實特穆爾已獲賊帝加勞之謝曰天威所臨猶風偃草臣何力之有有功不居以歸其君可謂達於禮矣皇孫特穆爾之獲主神器也始受皇太子寶撫軍北邊及世祖崩晉王噶瑪拉率宗親大臣合辭勸進事皆

決於伊實特穆爾絕窺覬奪違言以安宗社又其殊勳如此若爲御史大夫時務振宏綱弗親細故遇事廷辯吐辭鯁直皆無可議者例宜錄其賢而不書官爵失褒貶之實讀者不得以疑伊實特穆爾之尚有遺行也

安圖

春秋天王使仍叔之子來聘左傳仍叔之子弱也胡文定以爲戒後世人主徇大臣私意而用其子弟之弱者居公選之地以敗亂其國家國王穆呼哩四世孫安圖其母又昭睿皇后姊年十三世祖以追錄元勳命位在百寮上及拜中書右丞相尚弱年也且自幼未更事然其重稚能近

皆德而以老成語契上心爰立之初亦因崔熾采輿言之
薦卒之爲相二十年海內稱極治此可無議以徇私矣雖
然以弱而從未更事之子遽任以國之柱石而不反致傾
覆之貽患者亦千古一人而已後世如藉口安圖徇勳戚
遼公選官及幼弱列於權要鮮有不敗聖人之所以垂戒
也可或忽乎哉可或忽乎哉

崔或

崔或立朝以伉直名惜其獻傳國璽一事則詭道耳先儒
遞考秦璽相傳得失始末皆云後唐主從珂失國構以自
焚而亡其獻宋哲宗朝者已僞然則或何所得於太師國

王札刺兒氏之家且太師國王家而果曾獲是璽豈不見
如所云背紐盤螭而面有象文八皆若蟲鳥魚龍之狀者
則必且驚且疑辨識進獻以逃非望之罪而敢久匿不出
至是乃以爲常玉求鬻乎意者世祖晏駕皇太孫嗣立諸
王多違言或得是玉乃與闊闊木楊桓等詐爲秦璽之文
稱神物適出天意屬於皇太孫及請皇太妃親爲付授以
定其位然以視伊寶特穆爾巴等之宣揚顧命決計勸
進不共詭乎又其牋引唐代宗先封楚王及位正儲副而
楚州獻定國寶十有三爲太子瑞應以證皇太孫乃燕王
之子而神寶出於燕亦瑞應之兆嗚呼唐事乃妖尼真如

所爲而或甘附之其情矯妄斷可識矣豈不爲伉直者之深累哉

弈赫抵雅爾丁

史弈赫抵雅爾丁傳記其嘗與同列議獄謂但藉讀律。苟不能變通以適事宜譬之醫者雖熟於方論而不能切脈用藥則於疾痛奚益哉。稱以識者服爲名言又記大德閒肆赦廷議惟官吏因事受賄者不預弈赫抵雅爾丁曰不可贓吏固可嫉比之盜賊則有間矣宥盜而不宥吏何耶亦似以其說爲允然者夫盜賊以饑寒困苦而起其情猶可矜贓吏則桀黠貪婪庇奸回害良善欺上罔下爲政大

蠹亦往往致民憤怨不平而凶頑藉以竊發則又盜賊之媒以謂比之盜賊有間謬矣此明君賢相之制刑也必嚴於賊吏雖受賄有差枉法不枉法有差而並在不赦之條所以懲奸貪絕賄謁平政刑而清盜源也何怪乎宥盜而不宥吏哉不此之辨而執恩如雨露萬物均被之說則反不能變通以適事宜矣

鄂勒哲

鄂勒哲世稱賢相論者以嘗受朱清張瑄之贓因罰深言勸成宗征八百媳婦聞遠夷之釁而重誓之臣按博果密傳世祖欲用博果密爲丞相博果密辭帝問孰可對以鄂

勒哲可嚮者籍沒阿哈瑪特家其賂遺近臣皆有簿籍惟無鄂勒哲名然則以廉正自持服廷臣而膺王眷卽此可證必無人相後贓汚之事況值江南僧石守道撫清瑄不法事上聞時鄂勒哲在中書亦言二人屢致人言宜罷其官未嘗與爲曲庇乎如大德四年監察御史杜肯構言其與巴延等受清瑄賄賂事乃詔巴延等分別戍邊罷職而釋鄂勒哲不問則當日必有獨辨其誣者肯構殆如宋王曾以外傳知秦州王繼明納賂呂夷簡而言之乃有過耳哈喇哈斯傳大德五年同列有以劉深計倡議往征八百媳婦國哈喇哈斯諫不聽董士選傳亦記諫此事其云同

列者乃直指爲丞相鄂勒哲按之張立道傳鄂勒哲嘗與博果密諫止世祖討安南則不欲勞中國以事小夷如此其本傳云成宗倚任益重而能處以安靜不急於功利則又綜覈以斷其賢如此謂主深議啟成宗務遠略必非其實蓋亦記載失檢而自爲矛盾耳讀史者不可不加參考使夫世稱賢相冒此二大不謹之議以終也

成宗皇后巴約特

成宗末年多疾皇后巴約特氏居中用事帝崩而無嗣懷寧王哈尙即武宗其同母兄子而裕宗之孫世祖之嫡允
該北立功禮宜入繼大統后以戀大權且嘗謀貶懷寧母與

其弟阿裕爾巴里巴特喇卽仁宗往懷州恐報前怨乃與至

丞相阿圖岱等謀立安西王阿南達輔政而已垂簾以聽

阿南達雖同爲世祖孫而支子不嗣世祖之典謂是則撓

亂福制挾之以造禍而斬裕祚危宗社其罪幾與漢呂唐

武等矣續綱目於懷寧至上都書廢皇后巴約特氏居東

安殺之與正編書趙王倫廢皇后賈氏爲庶人殺之固而

義小異彼罪浮於殺然不予倫討此殺當其辜而專以罪

巴約特氏也故阿南達及同謀以誅書乃有異於書殺張

華裴頤之文也周氏發明謂罪懷寧以臣廢君以姪殺婦

若然曷不書弑而曰殺者罪之在也按當日不聞聲大義

告太廟臨之以祖而正其罪乃構后以私通事是誣而殺之以泄其前私怨耳則殺當作弑云

哈喇哈斯

哈喇哈斯爲左丞相值成宗崩武宗撫軍北邊仁宗侍母居懷慶丞相阿固岱等構亂此易之屯元亨利貞勿用有孚惠心利建侯時也戒以勿用者動乎險中不可不慮密勇況而輕躁則取困耳觀於哈喇哈斯悉收百司符印封府庫稱疾臥闕下遣使北迎武宗南迎仁宗及仁宗次近郊衆疑未知以奉成后御殿列牘請署乃陽許之衆亦莫知所為仁宗至則數以先事而發誅阿固岱等武宗遂入承

大統平內難以定君位於不動聲色之中非深有得易道者與然則千古大臣不幸而丁雷雨滿盈天造草昧之運亦可卽此知所占驗以善用其濟屯之才智矣英宗朝修仁宗實錄惟叔禿刺手搏阿固岱勇決狀而哈喇哈斯定策功不書卽拜珠聽讀命補入之則深謨懋績不詳於後世矣記載家類此筆削失當者豈少也哉曷勝慨然

王約

自來毓德青宮朝政非所干預此禮制也此乾初九潛龍勿用之義也反之而羣小窺伺讒搆以生禍釁之作千古寒心卽世祖之太子珍戩亦豈不由是以致南臺有內禪之

奏動帝以篡奪之疑不勝震怒乃爲之危懼而卒乎善乎副詹事王約之明大義以安儲位也時仁宗爲皇太子約持不可署左衛率府軍官持不可增立右衛率府持不可移文數千里取安西兵器給宿衛持不可命薛居往理陝西分地五事一則曰皇太子事不敢不爲天子事不敢爲再則曰太子潛龍也當勿用之時爲飛龍之事可乎張氏廣義以謂若王約者貽仁宗之哲命者也不誠然哉雖然武宗命太子領中書令樞密使繼命兼尚書令此珍哉兼百院事之覆轍約何無一言啟辭爲慎終固始之謀也至爲君父者誠不以寵私之過昧禮制不以飛龍之事假情

龍斯其造福於宗社也大矣

武宗 仁宗

綜理財用亦有國之政而亡國恆於斯則言利之臣嗜以多方掊克致民不聊生而社稷隨之北宋之事亦可鑒已然而爲人主者鮮不爲所惑而任之專至於斂怨基亡而不悟謂足以濟所欲故耳惟世祖尙能以一人養天下而不竭天下奉一人故一聞盧世榮僧格之興利害民卽行誅戮而改紀其弊竊意難以望之武宗也自僧格敗罷尙書省而武宗從托克托嘉輝帕哈哩鼎言復立以分理財用於是羣小擅權以割剝生民爲務卽帝久在位將母終

此覆轍而不能回蓋以其中多欲艌蘖是耽妃嬪是好呼鷹是娛珍異是貴而寵賜太濫營繕太廣費出不經封殖是亟彼托克托等有不安然據公位以肆其虐者乎幸乎仁宗卽位首罷尚書省按誅托克托等而後武宗之崇任聚斂不免其亡其亡之憂乃獲繫於苞桑也夫惟帝德恭儉澹然無欲故能繼世祖以除此毒民誤國之賊而宋程純公於神宗任王安石理財之際必以防欲入告于此益信爲切中病源之藥後世人主其可不深自省以祛所惑乎哉

史林測義卷三十八

臣鄱陽計大受論

馬祖常

儒生學在六經以明三綱五常之理修齊治平之道故凡肄其業者朝廷所宜優禮以培養士氣使成其才需國家用馬祖常曾祖月乃合事憲宗料民丁於中原凡業儒者試通一經卽不同編戶著爲令史稱儒人免丁者實月乃合始之也是蓋予以徭役之寬俾致其攻苦之專抑亦示以負異凡民必責成其遠者大者則所以爲國家造士意量深矣且夫儒者可貴不可賤亦可殺不可辱若不加愛

惜保全而非理挫折之則士氣消沮人才無由長養在人主非爲社稷計在人臣豈爲邦國計乎其不爲邦其昌計者亦未有昌於汝家者也臣因月乃合傳末著其子孫登

仕籍者甚衆至仁宗朝詔行科舉其曾孫祖常鄉會試皆舉首云云而祖常遂以碩儒爲名臣乃憶宋忠賢江相萬里傳首叙其大父璘聞鄰史知縣者以杖士人自憲語萬里父某且不昌汝其戒之是夕萬里母夢貴人入其家曰以汝家長有善言故來已而有娠生萬里嗚呼觀此二傳天之報註豈爽也哉爰彙舉之以爲爲國優禮士類者勸然而儒爲人所詬病亦多矣厲其廉恥以自爲不可賤不

可辱焉敢少恕乎

李邦寧

或問宦者李邦寧嘗黨三寶勢乘閒以未聞有子而立弟言於武宗及仁宗卽位左右咸請誅之帝曰神器攸歸自有天命其言何足介懷可不謂帝王之大度與曰否否易言直方大不習无不利其釋而不問者豈誠自然無私之心亦有意以矯之耳何以知其然耶觀於旋加邦寧以開府崇階且遣釋奠文廟皆故示優異使人莫測其包荒而不顧襄名器贊大禮其外不方者由中不直不直以方其道不光大惡得言乎此以含宏爲度者敬義之功其先務

也至若邦寧方行釋奠有大風滅燭之異因慚悔累日亦可知前此以武宗不悅其傳弟之沮慚懼而退者雖小人而天良未泯警戒猶存者也故懼而不同魯羽父之反譖史宦者傳論以邦寧嘗辭平章政事之命陳世祖華侈之戒勸親致太廟之饗謂其言亦有可稱臣且表其心尚無可誣焉

特們德爾

仁宗以特們德爾作相暱於皇太后恃勢貪虐兇穢日甚四每錄贊中丞楊多爾濟及內外御史四十餘人共糾正其罪廷車裂斬首以快人心帝不忍傷太后意但罷其位

似有得幹母之蠱不可貞之義矣未逾年復夤緣起爲太子太師中丞趙世延并內外臺又四十餘人共劾之然以太后故皆不聽則但知不可貞而比於裕蠱往見答矣帝崩方四日太后遂命特們德爾復入中書因以專權擅政戕戮忠賢卽他日特克實之弑英宗亦于是基其禍本也史稱仁宗天性慈孝事皇太后終身不違顏色嗚呼從親之令又焉得爲孝乎親有不義子不可以不爭親之過大子不可以不怨以太后所寵而故縱使爲惡之臣雖至臣民交嫉其亂政誤國而尙曲殉之卽彰母太后以有爽德於天下而弗顧弗恤也則不愛敬實甚乃以不違顏色言

孝此非其大端耶亦不知德教加百姓而刑四海之要道已失之遠矣

李孟

豫兮若冬涉川猶兮若畏四鄰以爲天下容能得其容無爲而有功不得其容動作必凶此老氏之言善爲天下者無爲而無不爲之道也若李孟之力請仁宗入定內難武宗未至則逃執政之命不知所之英宗之朝降授集賢學士欣然俯就如此之類其利害長短分數皆從不躁不矜沈幾觀變而得而用以折奸則莫禦用以杜讒則莫閒不亦智人而得老子之精者耶雖然孟於此非僅于任術蓋

亦有治心之學焉仁宗嘗令將作爲治第孟辭曰臣布衣
際遇所望於陛下者非富貴之謂也夫爲人臣而一有富
貴中於其心趨功利怙權勢見得而不見失知進而不知
退能伸而不能屈敗國亡家往往坐此而益乃謂乎遠矣
且非富貴之謂者其謂學聖人道而欲使君爲堯舜之君
民爲堯舜之民雖所學不必果克如是而所志則已不愧
名臣在政府多所補益而自視常若不及見不足故能賢
則亦老氏所謂廣兮其若谷也與

英宗

史稱英宗性剛明人君以天德之剛行無蔽欺之心庶乎

予奪進退生殺賞罰衷諸理而克斷而無爲亢爲虐之失
若英宗者但強明自任發之或暴而實不免於閼懦如以
亟建佛寺殺諫臣觀音保等既爲剛明之深累矣至特們
德爾挾私構殺蕭拜珠楊多爾濟賀勝譖令李孟左遷諫
下趙世延詔獄或不能爲之辨枉或察其非罪不能卽使
免於繩綱而巨慝乃獲以全要領逮其旣死罪惡暴著而
後籍其家削其爵然猶任奸黨特克實領左右阿速衛使
得因以行南坡之逆豈非前有讒而不見後有賊而不知
乎卽嘗自詔英察而優柔養奸亦其間於理之弊也惟知
拜珠之賢專任作相頗見剛明之性云

拜珠

惜哉拜珠之作相也史稱以進賢退不肖爲急務而何奸
薦苦特克實等反不急求遠之而以速禍不亦識慮疎甚
乎^王實助特們德爾以稔其惡特們德爾既死拜珠舉
臺分愛劉蓼贓及蔡道泰納金變獄二事劉蔡皆坐死
而特赦特克實不恤失刑則無以懲奸何也赦之而仍以
爲御史大夫命之振舉臺綱以糾臣下奸貪不顧其素行
奸貪之尤者何也赦之而仍以領左右衛阿速親軍都指
揮使不慮倒其刃而授奸人以柄何也觀朝廷處特克實
之脅亂若此餘黨亦尙多布列於位拜珠不能辭其責而

不仁之人又覺疾之已甚特懼德爾逃顯戮於生前則日求其過惡於死後以聞於帝籍其家奪其官仆其碑使特克實諸奸懷行將及之之懼則迫之以作亂而所以釀之資之者蓋已久矣南坡之弑拜珠雖盡忠效節殞于羣兇而昧於幾先疎於防患九原銜恨當復何如抑亦千古見惡不能遠之鑑不遠也

天順帝

泰定帝崩於上都太子喇實晉巴斯在丞相都爾蘇踰月不立君朝野疑懼大都留守雅克特穆爾乃乘閒迎立懷王國小特穆爾是爲文宗雖諸王羣臣卒奉太子正位

順而都爾蘇專權自利心實叵測及齊王伊噶特穆爾等以兵應懷王圍上都都爾蘇奉皇帝璽出降帝則不知所終瓊山邱氏以由懷王遣兵攻之致死地遂於世史書圖卜特穆爾弑之以謂誅首惡政不問其用挺與刃也雖然懷王於太子固君臣分定然視都爾蘇躬親北面職在毗廟者尙有間矣都爾蘇之義宜以死捍衛乎帝而何致有不知所終之理觀其奉皇帝璽出降不由帝遣則知帝已不在也帝何以不在卽初以自利不卽立君之心推之且卽嘗與特克寶構逆南坡之事例之則知爲所弑也明矣此春秋所必誅乃以不知所終存爲疑案而歸獄懷王不

亦失賊乎續綱目前書皇太子喇實晉巴卽位於上都及後勢感但以帝不知所終見之分注而都爾蘇出降亦未大書以著丞相叛國之罪母乃疎甚臣謂必於圖卜特穆爾兵陷上都下書丞相都爾蘇弑帝出降庶亂臣賊子無逃萬世之鉄鉞至都爾蘇見殺于圖卜特穆爾而非其罪亦不予賊誅賊則仍舊文書殺云元史天順帝不立本紀蓋以雅克特穆爾爲舉義明宗文宗爲當立雖天順正位

已逾數月而不成之爲君梁王旺心右丞相達實特穆爾等之用兵諸王滿都平章瑪魯等之謀叛諸事皆附見于明宗文宗之本紀也逮綱目修而順逆以正何邵遠平作

元史類編其叙天順更失之略乎

圖卜台

忠義之士惟明於君臣之分順逆之節至或成敗利害非所問矣雅克特穆爾遣使迎懷王於江陵密以意諭河南行省平章政事巴延巴延遂簡兵以備扈從獨參知政事國士皆聽從苟以爲君崩而太子現在神器有主安有舍其儲嗣別求武宗之子而君之者臣事先帝而托愛武宗恩寵以逞異圖逆莫大焉如助逆以犯順罪不容于誅以此責巴延乃足折其大義所臨曷敢顧望之說卽不能回而大義辨矣史顧記其言曰今蒙古軍與宿衛之士在上

都而令特默齊軍守諸隘吾恐此事之不可成也則是以成敗論不以順逆論豈事可成不妨從逆乎然而圖卜台於此蓋明於君臣之分順逆之節故巴延不從乃乎刃欲殺之卽殞身於巴延而弗恤也則所以告巴延殆亦爲其辭者之過乎抑史臣左袒巴延應懷王因又於圖卜台爲我等圖保性命他何所計之醜語以誣之也吁哉

遼王托克托

崇陽嗣目例將帥死節曰死之必其忠義暴著所以重予全節也凡死於兵曰戰死敗死而已按遼王托克托嘗乘國雅禮後宗親多行不義泰定初歸藩御史劾以嬖之縱

虎出柙以是人而謂大義克明効忠於國誓死不二無其
本矣致和元年與諸王共立泰定太子於上都其心未必
純乎義及城陷兵敗倉卒見殺續綱目以死之書非重乎
全節之旨無論倉卒未可信其人固無可信也書以敗死
可耳

雅克特穆爾

雅克特穆爾者元之逆臣也。泰定帝崩太子立乃迎武宗
二子舉兵犯上都而奪其位。及奉上璽綬於明宗又以從
官不爲禮怒且懼構成翁果察圖之變。然則文宗篡弑雅
克特穆爾實爲罪首。史不以列逆臣傳者蓋以迎立爲舉

義而明宗暴崩猶有文宗入哭盡哀雅克特穆爾以皇后命奉皇帝聖綬復授文宗之說也夫以義予雅克特穆爾既謬其本傳云明宗之崩實與逆謀則又未嘗存爲疑案茲姑勿論泰定帝后其故君也而取爲夫人泰定后自正衆者九傳不指何泰定后自正后卽正宮無疑悖亂至此以視順帝之世博囉特穆爾舉兵犯闕幽置皇后有過之無不及同列逆臣庶正其辜史則失之續綱目前書遷后於東安州以罪文宗后雖遷名號猶存而此不復大書以討雅克特穆爾亘古未有之罪何哉其因史舊文叙之分注僅僅與一宴或宰十三馬前後尙宗室女四十人以見肆行荒淫無忌亦殊乖輕重

之權衡矣至迎立事不過欲假以作亂而逞其志乃托受
武宗恩寵故人多惑之續綱目則以謀逆書張氏廢義以
謂豫讓有言既以委質爲臣而求殺之是二心也今雅克
特穆爾旣臣事泰定而有異圖此所以爲逆耳斷案明矣
但以分注有雅克特穆爾直宿禁中達旦不寐一夕再徙
人莫知其處者將一月又恐人心疑懼矯爲南使云懷王
且夕且至等語因謂逆事成於一月然後矯使以迎懷王
其初意將欲自移元鼎及知人心不服不得已而爲之此
殊附會牽強按以八月甲午起事卽命明里董阿乘驛迎
文宗於中興丁酉再遣撒里不花往中興趣大駕丁巳文

宗至京師距甲午僅二十四日所謂將一月也顧弗詳考而漫爲誅心之論乎卽逆臣爰書亦何須此深文也

明宗

嗚呼禍福之門利害之反不可不察以觀明宗其及也宜矣昔仁宗之平內難也諸王庫庫伊克圖等勸進力辭弗從詔爲監國以俟武宗之至以故克守皇太子之命而兄立善始善終若文宗之事則大謬不然方雅克特穆爾都迎則已備乘輿儀仗至京師而處大內不聞如漢文至滑騎馳入代邸尚不敢天子自處也及諸王大臣請立大鐘雖有兄在朔方不敢紊天序之辭豈本心哉不然

向不爲仁宗之權爲監國而遽卽位改元聞明宗卽位和
卓之始而自冊立皇后假而不歸之情亦彰彰矣若其
遣使往迎與奉皇帝璽者亦姑以塞人議且試明宗撫讓
之意與否而生異謀除將來之逼耳夫天位已定_{時以}
改者理也此在父子之際如唐肅宗旣立元宗自蜀還累
表請避位還東宮不許論者以爲儀文不可少而事勢必
不可行矧兄弟而得迭爲進退乎卽或出於本心猶莫保
中外之猜左右之搆非此所畏同春秋歎犬之前驅_{時以}
從官不爲禮致懼搆變似之則彼所防類有明南宮之復辟變故卽至
夫亦其幾可先見者矣使明宗而審慎乎此安遐踪于漠

北繼高讓乎荆蠻於以遠禍患而宜福祿不亦智首之事哉奈何利天下之富貪神器之重遽稱帝于中道而詔既御寢極者一旦退居太子之位以聽改其紀號停其冊立且率其嘗受朝之諸王百官同北面以事之禮此豈事勢之所可行乎事勢不可行而得以安然無故未之有也況思除其逼而挾僞相誘如文宗者乃不能及其至京師而困之於行幄矣然則明宗之及於禍蓋以趨利不疑之心蔽其明理察幾之智故曰宜哉

趙世延

史於趙世延以忠義清介拳拳於名教概其生平自臣接

之則前後判然若兩人焉方其爲御史大夫於仁宗之朝
也劾奏權相特們德爾罪惡十有三事厥後特們德爾報
怨誣搆下獄再歲迫之死而不爲動其風節卓有可觀丞
相拜珠言之英宗得釋泰定帝用爲中書右丞詔大爲昭
雪於天下無何泰定帝崩遂附樞密雅克特穆爾逆謀叛
嗣君迎立武宗二子至雅克特穆爾挾威震主肆行無忌
極之取泰定后爲夫人其罪惡尤浮於特們德爾者乃不
惟與爲徇默且嘗迎雅克特穆爾宴於其家男女列坐名
鴛鴦會以逢荒淫之惡又何行之醜賤至是也據此以觀
尚可言忠義乎言清介乎不亦名教之罪人乎臣非不樂

成其美而責其備故異乎史臣之論無如前後之邪正判然不能相掩抑懼天下後世其始有君子之行者因之不力檢于末路之敗也

台哈布哈此史作泰不華

至正閒盜賊蠭起猖獗無忌者自招安方國珍始國珍兄弟以讎逼入海爲亂烏合之衆勦捕非難而官軍討之數致敗績者徒以命將非人如多爾濟巴勒如博羅特穆爾皆以不嚴整部陣自相驚潰被執也初多爾濟巴勒一作彌國珍遣而焚舟將遁矣繼而台哈布哈攻之於溫州亦一夕遁去矣使朝廷必痛加誅勦以遏亂萌遷將厲士功可

計日待何反利于養痈不顧損國威靈累下招安授官之詔雖台哈布哈稔知賊情狀請加勦史作捕^{招誤}而不聽乎台

哈布哈跋國珍兄弟以受招登岸止民間謀率壯士襲殺之誠計萬全以除此旋降旋叛之寇雖專之可也顧以達實特穆爾擅命之說而止亦可惜耳卒墮其計以往受降賊於澄江死之盡忠報國素志遂矣然以當日紀綱不振招安失策空爲痛憤賊乃接踵遍於天下而國因以亡忠魂飲恨長此終古耳

托克托

此史作脫脫

開誠心布公道者諸葛武鄉侯也平生無私喜怨於一人

者范汝南公也兩人之相業所由光明俊偉無閒於後世
托克托嘗求日記古人嘉言善行服之終身何獨不聞此
義乎當日亦號稱賢相然不能開誠布公而私喜怨之心
且爲害烈矣膏以其弟額森特穆爾喪師辱國怒西臺御
史大夫多爾濟巴勒等劾其罪則左遷之而且欲置之死
由是人莫敢言事而天下之人心解體矣又以不知其歸
自徙所左相太平有德於己則雖正人而欲中傷之而深
德哈瑪爾營護功則不問其奸邪而引爲右丞哈瑪爾卒
尋帝於荒淫無度不恤政務以至亡國而托克托之以謫
置被鵝亦卽其人爲之也夫以私而比之匪人苟及其身

不足惜。以私而遠忠直。曖邪佞。階國家覆敗之禍。可勝嘆哉。雖不伐不驕。始終不失臣節。似得力古有道大臣之學。要無解爲諸葛二公之罪人耳。或謂托克托初以大義滅親。謀黜巴延公忠殉國之心。暴於天下。雖然。非以其師異直方言。則亦懼赤其族。起見猶未免於私意也。抑巴延其世父。而且爲所養者於其弑皇后殺諸王專權。自恣虐害天下。宜効三諫。不聽號泣而隨之。義何絕。不聞切爭。即使入宿衛。偵帝起居。亦不聞乘機進諫。以遏異謀。而竟藉以圖之乎。巴延道出真定。父老因問而有不曾見子殺父。惟見臣弑君之嘲陳氏。以爲千古大快。臣謂托克托賣父之

罪亦正未可以克忠王室而未滅焉

台哈布哈

順帝本紀書監察御史七十等糾劾太保中書右丞相台哈布哈詔削台哈布哈官爵安置蘆州又書台哈布哈伏誅續綱目變文以前右丞相台哈布哈官爵尋殺之書則從無罪例蓋以與丞相太平有隙劾之殺之皆由太平修私怨也雖然台哈布哈豈不受誅者哉其初代托克托總軍輒驕傲不遵朝廷命令已有不臣之迹矣及是奉詔討賊諸將皆欲進兵乃以養銳爲名反勒兵而退汴梁請援至十往反按甲不動而出軍縱掠百里蕩然是亦賊耳自

是寇日蔓延而不可制朝廷兩遣重臣諭旨皆不聽乃請令太平至軍中供給欲因以甘心亦如銜參政卜顏特穆爾張晉密院完者特穆爾等擅改官斷遣加害不忌廷議也則不臣之迹愈著而春秋之將則必誅雖太平知其害己諷御史劾以緩師拒命之罪不可謂非其罪也雖太平囑其故部將劉哈喇布哈縛送京師而殺之於路然引哈喇布哈入見帝必被密旨非矯殺帝蓋以其子奏事驕慢而惡之久矣台哈布哈有必誅之罪則遂舉勅罰之權歸之天子以微不臣可也續綱目乃不恕太平之修怨而恕台哈布哈之不臣失輕重之衡如五代蜀王宗弼王承休

誤國蜀亡唐郭崇韜挾私殺之紫陽綱目尚以伏誅青審
輕重也臣謂宜仍從本紀書曰右丞相台哈布哈有罪削
官爵尋誅之至台哈布哈傳云太平諭御史劾奏而於帝
前力譖之譖近誣非是周氏發明云正人蒙難可勝惜哉
尤屬瞽說

察罕特穆爾

元德而既衰矣天使不挾四方紛紛逐鹿割據稱雄其時
朝臣邊將賊亂無策敵愾無聞察罕特穆爾慨然起草澤
而奮揮日之戈定河北定關中定河東定河南定山東厥
功偉矣說者以謂非其過於推誠疎於防患見刺降賊因

豐則督僞削平疆宇恢復且與古中興名將比烈而察罕特穆爾之不幸實元之社稷之不幸也然自臣論之亦未必克竟其功察罕嘗平定晉冀而博囉特穆爾欲併據之遂至兵爭博囉夫何誅以察罕忠勤乃不思趁薦廉漢寇賈爲國而屈之義卽朝廷遣使以地畀博囉而不奉詔何哉至其子庫庫特穆爾且日與博囉李思齊張良弼等尋仇構兵罔恤國家之患明王禕論順帝兼有強藩以亡其國者此也蓋亦由詔謀之不臧則望終能釋怨以靖內訌戮力以禦外侮而使金甌復全寶鼎重安殆非察罕特穆爾事卽不然明祖膺圖元室訖命設無白氣之祥應以良

將之頽原其初之攄忠効義亦或臣力旣竭臣節不渝耿
耿丹心畱照汗青耳中興云乎哉